

水經注匯校卷九

江西新城楊希閔卧雲校本

後魏 酈道元 撰

清水 沁水 淇水

蕩水 洹水

清水出河內修武縣之北黑山

黑山在縣北白鹿山東清水所出也上承諸陂散泉積以成川南流西南屈瀑布乘巖懸河注壑二十餘丈雷赴之聲震動山谷左右石壁層深獸跡不交隍中散水霧合視不見底南峯北嶺多結禪栖之士東巖西谷又是剎靈之圖竹柏之懷與神心妙遠仁智之性共山水效深更爲勝處也其水厯澗飛流清冷洞觀謂之清水矣溪曰瑤溪又

水經注匯校 卷九

曰瑤澗清水又南與小瑤水合水近出西北窮溪東南流注清水清水又東南流吳澤陂水注之水上承吳陂于修武縣故城西北修武故甯也亦曰南陽矣馬季長曰晉地自朝歌以北至中山爲東陽朝歌以南至軹爲南陽故應劭地理風俗記云河內殷國也周名之爲南陽又曰晉始啟南陽今南陽城是也秦始皇改曰修武徐廣王隱並言始皇改瓚注漢書云案韓非書秦昭王越趙長平西伐修武時秦未兼天下修武之名久矣余案韓詩外傳言武王伐紂勒兵于甯更名甯曰修武矣魏獻子田大陸還卒于甯是也漢高帝八年封都尉魏邀爲侯國亦曰大修武有小故稱大小修武在東漢祖與滕公濟自玉門津而宿小

修武者也大陸卽吳澤矣魏土地記曰修武城西北二十里有吳澤水陂南北二十許里東西三十里西則長明溝入焉水有二源北水上承河內野王縣東北界溝分枝津爲長明溝東逕雍城南寒泉水注之水出雍城西北泉流南注逕雍城西春秋僖公二十四年王將以狄伐鄭富辰諫曰雍文之昭也京相璠曰今河內山陽西有故雍城又東南注長明溝溝水又東逕射犬城北漢大司馬張揚爲將楊醜所害眭固殺醜屯此欲北合袁紹典略曰眭固字白菟或戒固曰將軍字菟而此邑名犬菟見犬其勢必驚宜急去固不從漢建安四年魏太祖斬之于此以魏種爲河內太守守之沈州叛太祖曰惟種不棄孤及走太祖怒

曰種不南走越北走胡不汝置也射犬平禽之公曰惟其才也釋而用之長明溝水東入石澗東流蔡溝水入焉水上承州縣北白馬溝東分謂之蔡溝東會長明溝水又東逕修武縣之吳亭北東入吳陂次北有苟泉水入焉水出山陽縣故修武城西南同源分派裂爲二水南爲苟泉北則吳瀆二瀆雙導俱東入陂山陽縣東北二十五里有陸眞阜南有皇母馬鳴二泉東南合注于吳陂也次陸眞阜之東北得覆釜堆堆南有三泉相去四五里參差次合南注于陂泉在濁鹿城西建安二十五年魏封漢獻帝爲山陽公濁鹿城卽是公所居也陂水之北際澤側有隕城春秋隱公十一年王以司寇蘇忿生之田攢茅隕十二邑與

鄭者也京相璠曰河內修武縣北有故隕城實中今世俗謂之皮垣方四百步實中高八丈際陂北隔水十五里俗所謂蘭丘也方二百步西十里又有一丘際山世謂之勑丘方五百步形狀相類疑卽古攢茅也杜預曰二邑在修武縣北所未詳也又東長泉水注之源出白鹿山東南伏流逕十三里重源濬發于鄧城西北世亦謂之重泉水也又逕七賢祠東左右筠篁列植冬夏不變貞萋魏步兵校尉陳留阮籍中散大夫譙國嵇康晉司徒河內山濤司徒琅邪王戎黃門郎河內向秀建威參軍沛國劉伶始平太守阮咸等同居山陽結自得之遊時人號之爲竹林七賢向子期所謂山陽舊居也後人立廟于其處廟南又有一

泉東南流注于長泉水郭緣生述征記所云白鹿山東南二十五里有嵇公故居以居時有遺竹焉蓋謂此也其水又南逕鄧城東名之爲鄧瀆又謂之爲白屋水也昔司馬懿征公孫淵還達白屋卽于此也其水又東南流逕隕城北又東南歷澤注于陂陂水東流謂之八光溝而東流注于清水謂之長清河而東周永豐塢有丁公泉發于焦泉之右次東得焦泉泉發于天門之左天井固右天門山石自空壯若門焉廣三丈高兩匹深丈餘更無所出世謂之天門也東五百餘步中有石穴西向裁得容人東南入徑至天井直上三匹有餘扳躡而升至平東西二百步南北七百步四面險絕無由升陟矣上有比丘釋僧訓精舍

寺有十餘僧給養難周多出下平有志者居之寺左右雜樹疏頽有一石泉方丈餘清水湛然常無增減山居者資以給飲北有石室二口向云口疑亦闕文舊是隱者念一之所今無人矣泉發于北阜南流成溪世謂之焦泉也次東得魚鮑泉次東得張波泉次東得三淵泉梗河參連女宿相屬朱箋按隋天文志梗河三星在大角北女宿卽須女四星此蓋謂魚鮑張波三淵之三泉如梗河之參連並焦泉爲四似女宿之相屬也是四川在重門城西並單川南注也重門城昔齊王芳爲司馬師廢之宮于此卽魏志所謂送齊王于河內重門者也城在共縣故城西北二十里城南有安陽陂次東又得卓水陂次東有百門陂陂方五百步在共縣故城西漢高帝八年封盧罷師爲共侯卽共和之故國也共

水經注匯校

卷九

四

伯旣歸帝政逍遙于共山之上山在國北所謂共北山也仙者孫登之所處袁彥伯竹林七賢傳嵇叔夜嘗採藥山澤遇之于山冬以被髮自覆夏則編草爲裳彈一絃琴而五聲和其水三川南合謂之清川又南逕凡城東司馬彪袁山松郡國志曰共縣有凡亭周凡伯國春秋隱公七年經書王使凡伯來聘是也杜預曰汲郡共縣東南有凡城今在西南其水又西南與前四水總爲一瀆又謂之陶水南流注于清水清水又東周新豐塢又東注也

東北過獲嘉縣北

漢書稱越栢呂嘉反武帝元鼎六年巡行于汲郡中鄉得呂嘉首因以爲獲嘉縣後漢封侍中馮石爲侯國縣故城

西有漢桂陽太守趙越墓冢北有碑越字彥善縣人也累遷桂陽郡五官將尚書僕射遭憂服闋守河南尹建甯中卒碑東又有一碑碑北有石柱石牛羊虎俱碎淪毀莫記清水又東周新樂城城在獲嘉縣故城東北卽汲之新中鄉也

又東過汲縣北

縣故汲郡治晉太康中立城西北有石夾水飛湍濬急人亦謂之礮溪言太公嘗釣于此也城東門北側有太公廟廟前有碑碑云太公望者河內汲人也縣民故會稽太守杜宣白令崔瑗曰太公本生于汲舊居猶存君與高國同宗太公載在經傳今臨此國宜正其位以明尊祖之義于

水經注匯校

卷九

是國老王喜廷椽鄭篤功曹邠勤等

何云邠舊作邵非也姓苑有邠氏隸釋作

邠

咸曰宜之遂立壇祀爲之位主城北三十里有太公泉

泉上又有太公廟廟側高林秀木翹楚競茂相傳云太公之故居也晉太康中范陽盧無忌爲汲令立碑于其上太公避紂之亂屠隱市朝遯釣魚水何必渭濱然後礮溪苟愜神心曲渚則可礮溪之名斯無嫌矣清水又東逕故石梁下梁跨水上橋石崩褫餘基尙存清水又東與倉水合水出西北方山山西有倉谷

趙本作水出方山上山在衛縣西有倉谷云云多上在衛

縣四字蓋據寰宇記引此文增也閱案傳記引古多有增減不能盡據於義無關且仍原本谷有倉玉

珉石故名焉其水東南流潛行地下又東南復出俗謂之雹水東南歷毋野自朝歌以南南暨清水土地平衍據皋

踐澤悉毋野矣。郡國志曰朝歌縣南有牧野竹書紀年曰周武王率西夷諸侯伐殷敗之于毋野詩所謂毋野洋洋檀車煌煌者也有殷大夫比干冢前有石銘題隸云殷大夫比干之墓所記惟此今已中折不知誰所誌也。太和中高祖孝文皇帝南巡親幸其墳而加弔焉刊石樹碑列于墓隧矣。雹水又東南入于清水清水又東南逕合城南故三會亭也以淇清合河故受名焉。清水又屈而南逕鳳凰臺東北南注也。

又東入于河

謂之清口即淇河口也蓋互受其名耳地理志曰清河水出內黃縣南無清水可來所有者惟鍾是水耳蓋河徙南

水經注匯校 卷九

注清水瀆移匯流逕絕餘目尚存故東川有清河之稱相嗣不斷曹公開白溝遏水北注方復故瀆矣。

沁水出上黨涅縣謁戾山

沁水即涅水也或言出穀遠縣羊頭山世靡谷三源奇注逕瀉一隍又南會三水歷落出左右近溪參差翼注之也

南過穀遠縣東又南過隋氏縣東案隋氏屬上黨猗氏屬河東原本及近刻隋並誤作

猗注內同今改正

穀遠縣王莽之穀近也沁水又南逕隋氏縣故城東劉聰以詹事魯繇為冀州治此也沁水又南歷隋氏關又南與

羸羸水合沈氏大成曰羸玉篇音風幽切一音彪又音焱水出東北巨駿山乘高瀉浪觸石流響世人因聲以納稱西南流注于沁沁水又

南與秦川水合水出巨驂山東帶引眾溪積以成川又西南逕端氏縣故城東昔韓趙魏分晉遷晉君于端氏縣卽此是也其水南流入于沁水

又南過陽阿縣東

沁水南逕陽阿縣故城西魏土地記曰建興郡治陽阿縣郡西四十里有沁水南流沁水又南與濩澤水合水出濩澤城西白澗嶺下東逕濩澤墨子曰舜漁濩澤應劭曰澤在縣西北又東逕濩澤縣故城南蓋以澤氏縣也竹書紀年梁惠成王十九年晉取玄武濩澤者也其水際城東注又東合清淵水水出其縣北東南逕濩澤城東又南入于澤水澤水又東得陽泉水出鹿臺山山上有水淵而不

水經注匯校

卷九

七

流其水東逕陽陵城南卽陽河縣之故城也漢高帝七年

封卞訢爲侯國

趙氏一清曰封陽阿者史漢表均作濟侯卞訢封邑當屬平原之阿陽非陽阿也詳

河水篇注河水篇高帝六年封卞訢中萬訢爲侯國卞萬互差是傳寫譌耳水歷嶠嶢山東下與

黑嶺水合水出西北黑嶺下卽開陞也其水東南流逕北鄉亭下又東南逕陽陵城東南注陽泉水陽泉水又南注濩澤水澤水又東南有上澗水注之水導源西北輔山東逕銅于崖南歷析城山北山在濩澤南禹貢所謂砥柱析城至于王屋也山甚高峻上平坦下有二泉東濁西清左右不生草木數十步外多細竹其水自山陰東入濩澤水濩澤水又東南注于沁水沁水又東南陽阿水左入焉水北出陽阿川南流逕建興郡西又東南流逕午壁亭東而

南入山其水沿波漱石瀨澗八丈環濤轂轉西南流入于沁水沁水又南五十餘里沿流上下步徑裁通小竹細筍被于山渚蒙龍茂密奇爲翳薈也

又南出山過沁水縣北

沁水南逕石門謂之沁口魏土地記曰河內郡野王縣西七十里有沁水左逕沁水城西附城東南流也石門是晉安平獻王司馬孚之爲魏野王典農中郎將之所造也按其表云臣孚言臣被明詔興河內水利臣既到檢行沁水源出銅鞮山屈曲周迴水道九百里自太行以西王屋以東層巖高峻天時霖雨眾谷走水小石漂迸木門朽敗稻田汎濫歲功不成臣輒按行去堰五里以外方石可得數

水經注匯校

卷九

八

萬餘枚臣以爲累方石爲門若天賜旱增堰進水若天霖雨陂澤充溢則閉防斷水空渠衍澇足以成河雲雨由人經國之謀暫勞永逸聖王所許願陛下特出臣表勅大司農府給人工勿使稽延以贊時要臣孚言詔書聽許于是夾岸累石結以爲門用代木門枋故石門舊有枋口之稱矣溉田頃晦之數問二案問二說舛朱謀埠云當作閒關歲月之功事見門側石銘矣水西有孔山山上石穴洞開穴內石上有車轍牛跡耆舊傳云自然成著非人功所就也其水南分爲二水一水南出爲朱溝水沁水又逕沁水縣故城北蓋藉水以名縣矣春秋之少水也京相璠曰晉地矣又云少水今沁水也沁水又東逕沁水亭北世謂之小沁城沁水又



東右合小沁水水出北山臺淳淵南流爲臺淳水東南入  
沁水沁水又東倍澗水注之水北出五行之山南流注于  
沁水

又東過野王縣北

沁水又東邗水注之水出太行之阜山卽五行之異名也  
淮南子曰武王欲築宮于五行之山周公曰五行險固德  
能覆也內貢迴矣使吾暴亂則伐我難矣君子以爲能持  
滿高誘云今太行山也在河內野王縣西北上黨關詩所  
謂徒殆野王道傾蓋上黨關卽此山矣其水南流逕邗城  
西故邗國也城南有邗臺春秋僖公二十四年王將伐鄭  
富辰諫曰邗武之穆也京相璠曰今野王西北三十里有

水經注匯校 卷九

故邗城邗臺是也今故城當太行南路道出其中漢武帝  
封李壽爲侯國邗水又東南逕孔子廟東廟庭有碑魏大  
和元年孔靈度等以舊宇毀落上求修復野王令范眾愛  
河內太守元真刺史咸陽公高允表聞立碑于廟治中劉  
明別駕呂次文主簿向班虎苟靈龜以宣尼大聖非碑頌  
所稱宜立記焉云仲尼傷道不行欲北從趙鞅聞殺鳴鐸  
遂旋車而反及其後也晉人思之于太行嶺南爲之立廟  
蓋往時迴轅處也余按諸子書及史籍之文並言仲尼臨  
河而歎曰丘之不濟命也夫是非太行迴轅之言也碑云  
魯國孔氏官于洛陽因居廟下以奉蒸嘗斯言是矣蓋孔  
氏遷山下追思聖祖故立廟存饗耳其猶劉累遷魯立堯

祠于山矣。非謂迴轅于此也。邗水東西逕邗亭。西京相璠曰：又有亭在臺西南三十里。今是亭在邗城東南七八里。蓋京氏之謬耳。或更有之余所不詳。其水又南流注于沁。沁水東逕野王縣。故城北。秦昭王四十四年，白起攻太行道絕而韓之野王降。始皇拔魏東地置東郡。衛元君自濮陽徙野王，卽此縣也。漢高帝元年爲殷國，二年爲河內郡。王莽之後遂縣曰平野矣。魏懷州刺史治皇都，遷洛省州。復郡水北有華嶽廟，廟側有攢柏數百根，對郭臨川負岡蔭渚。青青爛望，奇可翫也。懷州刺史頓丘李洪之之所經構也。廟有碑焉，是河內郡功曹山陽荀靈龜以和平四年造。天安元年立。沁水又東朱溝枝津入焉。又東與丹水合。

水出上黨高都縣故城東北阜下，俗謂之源源水。山海經曰：沁水之東有林焉，名曰丹林。丹水出焉，卽斯水矣。丹水自源東北流，又屈而東注左。會絕水。地理志曰：高都縣有堯谷，丹水所出，東南入絕水。是也。絕水出涿氏縣西北楊谷。故地理志曰：楊谷絕水所出，東南流左。會長平水。水出長平縣西北小山，東南流逕其縣，故城涿氏之長平亭也。史記曰：秦使左庶長王齕攻韓，取上黨。上黨民走趙。趙軍長平，使廉頗爲將，後遣馬服君之子趙括代之。秦密使武安君白起攻之，括四十萬眾降，起坑之于此。上黨記曰：長平城在郡之南，秦壘在城西，二軍共食，流水澗相去五里。秦坑趙眾，收頭顱築臺于壘中，因山爲臺。崔嵬桀起，今

仍號之曰白起臺城之左右沿山亘隰南北五十許里東西二十餘里悉秦趙故壘遺壁舊存焉漢武帝元朔二年以封將軍衛青爲侯國其水東南流注絕水絕水又東南流逕泫氏縣故城北竹書紀年曰晉烈公元年趙獻子城泫氏絕水東南與泫水會水導源縣西北泫谷東流逕一故城南俗謂之都鄉城又東南逕泫氏縣故城南世祖建武六年封萬普爲侯國而東會絕水亂流東南入高都縣右入丹水上黨記曰長平城在郡南山中丹水出長平北山南流秦坑趙眾流血丹川由是俗名爲丹水斯爲不經矣丹水又東南流注于丹谷卽劉越石扶風歌所謂丹水者也晉書地道記曰縣有太行關丹溪爲關之東谷途自

水經注匯校

卷九

十一

此去不復由關矣丹水又逕二石人北而各在一山角倚相望南爲河內北曰上黨二郡以之分境丹水又東南歷西巖下巖下有泉湧發洪流巨輪淵深不測蘋藻芡芹竟川含緣雖巖辰肅月無變暄萋丹水又南白水注之水出高都縣故城西所謂長平白水也東南流歷天井關地理志曰高都縣有天井關蔡邕曰太行山上有天井關在井北遂因名焉故劉歆遂初賦曰馳太行之險峻入天井之高關太元十五年晉征虜將軍朱序破慕容永于太行遣軍至白水去長子百六十里白水又東天井溪水會焉水出天井關北流注白水世謂之北流泉白水又東南流又丹水謂之白水交丹水又東南出山逕郟城西城在山

際俗謂之期城非也司馬彪郡國志曰山陽有郟城京相  
璠曰河內山陽西北六十里有郟城竹書紀年曰梁惠成  
王元年趙成侯偃韓懿侯若伐我葵卽此城也丹水又南  
屈而西轉光溝水出焉丹水又西逕苑鄉城北南屈東轉  
逕其城南東南流注于沁謂之丹口竹書紀年曰晉出公  
五年丹水三日絕不流幽公九年丹水出相反擊卽此水  
也沁水又東光溝水注之水首受丹水東南流界溝水出  
焉又南入沁水沁水又東南流逕成鄉城北又東逕中都  
亭南左合界溝水水上承光溝東南流長明溝水出焉又  
南逕中都亭西而南流注于沁水也

又東過州縣北

案州原本及近刻並訛作周注內故州也同今改正

水經注匯校

卷九

三

縣故州也春秋左傳隱公十有一年周以賜鄭公孫段

案

三字上有脫文當云昭公三六國時案此三字誤當  
年晉以州田賜鄭公孫段  
子徙居之  
段之子豐施因于產如晉歸州田晉侯以與韓宣子宣子  
以易原縣於樂大心事上去隱公十一年甚遠韓起又下  
不及六國時且未嘗徙居之州縣杜預注云今屬河內郡  
亦未詳州卽周縣否也  
戴氏震云隱十一年周以賜鄭  
此句無誤何義門誤連公孫段爲一句失之  
全氏祖望曰周  
國時韓宣子徙居之凡十二字有脫誤  
以賜鄭下有脫文蓋州本溫地蘇忿生叛王以賜鄭鄭不  
能有也晉啓南陽州入焉趙氏卻氏欒氏遞有之昭公三  
年晉以賜鄭公孫段七年復歸之晉而韓宣子以易原縣  
於宋樂大心然其後仍屬晉公家宋行人樂祁之死晉人  
止其尸于州以求盟是也史記韓宣子晚居州然則宣子  
雖不逮六國時而未始不居州也其文不見於左而見于  
史義門覈之未盡  
閔案何氏全氏及官本皆以周以賜  
鄭公孫段爲一句戴謂何氏誤讀者非也但上下實有脫  
耳  
文有白馬溝水注之水首受白馬湖湖一名朱管陂陂上

承長明溝湖水東南流逕金亭西分爲二水一水東出爲蔡溝一水南注于沁也

又東過懷縣之北

韓詩外傳曰武王伐紂到邢丘更名邢丘曰懷春秋時赤翟伐晉圍懷是也王莽以爲河內故河內郡治也舊三河之地矣韋昭曰河南河東河內爲三河也縣北有沁陽城沁水逕其南而東注也

又東過武德縣南又東南至滎陽縣北東入于河

沁水于縣南水積爲陂通結數湖有朱溝水注之其水上承沁水于沁水縣西北自枋口東南流奉溝水右出焉又東南流右泄爲沙溝水也其水又東南于野王城西枝渠

水經注匯校

卷九

三

左出焉以周城漑東逕野王城南又屈逕其城東而北注沁水朱溝自枝渠東南逕州城南又東逕懷城南又東逕殷城北郭緣生述征記曰河之北岸河內懷縣有殷城或謂楚漢之際殷王卬治之非也余按竹書紀年云秦師伐鄭次于懷城殷卽是城也然則殷之爲名久矣知非從卬始昔劉曜以郭默爲殷州刺史督緣河諸軍事治此朱溝水又東南注于湖湖水右納沙溝水水分朱溝南派東南逕安昌城西漢成帝河平四年封丞相張禹爲侯國今城之東南有古冢時人謂之張禹墓余按漢書禹河內軹人徙家蓮勺鴻嘉元年禹以老乞骸骨自治冢塋起祠堂于平陵之肥牛亭近延陵奏請之詔爲徙亭哀帝建平二年

薨遂葬于彼此則非也沙溝水又東逕隰城北春秋僖公二十五年取大叔于溫殺之于隰城是也京相璠曰在懷縣西南又逕殷城西東南流入于陂陂水又值武德縣南至滎陽縣北東南流入于河先儒亦咸謂是溝爲濟渠故班固及闕駟並言濟水至武德入河蓋濟水枝瀆條分所在布稱亦兼丹水之目矣

### 淇水出河內隆慮縣西大號山

山海經曰淇水出沮洳山水出山側頽波瀾注衝激橫山山上合下開可減六七十步巨石礫柯交積隍澗傾瀾漭盪勢同雷轉激水散氛曖若霧合又東北沾水注之水出壺關縣東沾臺下石壁崇高昂藏隱天泉流發于西北隅

### 水經注匯校

#### 卷九

十四

與金谷水合金谷卽沾臺之西溪也東北會沾水又東流注淇水淇水又逕南羅川又歷三羅城北東北與女臺水合水發西北三女臺下東北流注于淇淇水又東北歷淇陽川逕石城西北城在原上帶澗枕淇淇水又東北西流水注之水出東大嶺下西流逕石樓南在北陵石上練垂桀立亭亭極峻其水西流水也又東逕馮都壘南世謂之淇陽城在西北三十里淇水又東出山分爲二水水會立石堰遏水以沃白溝左爲苑水右則淇水自元甫城東南逕朝歌縣北竹書紀年晉定公十八年淇絕于舊衛卽此也淇水又東右合泉源水水有二源一水出朝歌城西北東南流老人晨將渡水而沈吟難濟紂問其故左右曰老

者髓不實故晨寒也紂乃于此斫脛而視髓也其水南流東屈逕朝歌城南晉書地道記曰本沫邑也詩云爰采唐矣沫之鄉矣殷王武丁始遷居之爲殷都也紂都在禹貢冀州大陸之野卽此矣有糟丘酒池之事焉有新聲靡樂號邑朝歌晉灼曰史記樂書紂作朝歌之音朝歌者歌不時也故墨子聞之惡而迴車不逕其邑論語比考讖曰邑名朝歌顏淵不舍七十二子揜目宰予獨顧由蹙墮車宋均曰子路患宰予顧視凶地故以足蹙之使墮車也今城內有殷鹿臺紂昔自投于火處也竹書紀年曰武王親禽帝受辛于南單之臺遂分天之明南單之臺蓋鹿臺之異名也武王以殷之遺民封紂子武庚于茲邑分其地爲三

水經注匯校

卷九

五

曰邶鄘衛使管叔蔡叔霍叔輔之爲三監叛周討平以封康叔爲衛箕子佯狂自悲故琴操有箕子操逕其墟父母之邦也不勝悲作麥秀歌後乃屬晉地居河淇之間戰國時皆屬於趙男女淫縱有紂之餘風土險多寇漢以虞詡爲令朋友以難治致弔詡曰不遇盤根錯節何以別利器乎又東與左水合謂之馬溝水水出朝歌城北東流南屈逕其城東又東流與美溝水合水出朝歌西北大嶺下案此卽二源東流逕駱駝谷于中透迤九十曲故俗有美溝之日矣歷十二嶧嶧流相承泉響不斷返水捍注捲復深隍隍間積石千通水穴萬變觀者若思不周賞情之圖狀矣其水東逕朝歌城北又東南流注馬溝水又東南注淇水

為肥泉也。故衛詩曰：我思肥泉，茲之永歎。毛注云：同出異歸，為肥泉。爾雅曰：歸，異出，同曰肥。釋名曰：本同出，時所浸潤，水少所歸，枝散而多，似肥者也。犍為舍人曰：水異出，流行合同，曰肥。今是水異出，同歸矣。博物志謂之澳水。詩云：瞻彼淇澳，采芣芣，毛云：芣，王芻也。竹編竹也。閔案：趙本箋毛傳作篇竹，爾雅作篇蓄。漢武帝塞決河，斬淇園之竹木，以為用寇恂為河內，伐竹淇川，治矢百餘萬，以輸軍資。今通望淇川，無復此物。惟王芻編草。編趙本，作篇。不異毛興，又言澳隈也。鄭亦不以為津源，而張司空專以為水流入于淇，非所究也。然斯水即詩所謂泉源之水也。故衛詩云：泉源在左，淇水在右。衛女思歸，指以為喻。淇水左右，蓋舉水所入為左右。

水經注匯校 卷九

也。趙云：泉源水入淇，即今衛輝府之輝縣衛河也。道元詳其水而逸其名。淇水又南，歷枋堰。

舊淇水口東流，逕黎陽縣界南入河。地理志曰：淇水出共東，至黎陽入河。溝洫志曰：遮害亭西十八里至淇水口，是也。漢建安九年，魏武王于水口下大枋木以成堰。遏淇水東入白溝，以通漕運。故時人號其處為枋頭。是以盧諶征艱賦曰：後背洪枋，巨堰深渠，高堤者也。自後遂廢。魏熙平中，復通之。故渠歷枋城北，東出，今瀆破故場，其堰悉鐵柱木石，參用其故。瀆南逕枋城西，又南分為二水：一水南注清水，水流上下更相通，注河。清水盛。案：水有二源，至此句清水字止，舊刻誤在灤水注內，八風谷之縑石也。縑字下原本不誤。北入故渠，自此始矣。一水東流，逕枋城南，東與苑口合。苑水上承淇水于元甫城西北，自石



堰東苑城西屈逕其城南又東南流歷土軍東北案土軍原本及

近刻並誤作五軍考土軍漢書地理志屬河西郡北魏立吐京郡吐京即土軍音聲之轉魏討九原西河吐京諸叛部出配郡縣置吐京民於此但魏書作吐京道元猶用土軍字耳得舊石逗故五水分流

世號五穴口今惟通并為二水一水西注淇水謂之天井

溝一水逕土軍東分為蓼溝東入白祀陂又南分東入同

山陂溉田七十餘頃二陂所結即臺陰野矣苑水東南入

淇水淇水右合宿胥故瀆瀆受河于頓丘縣遮害亭東黎

山西北會淇水處立石堰遏水合更東北注魏武開白溝

因宿胥故瀆而加其功也故蘇代曰決宿胥之口魏無虛

頓丘即指是瀆也淇水又東北流謂之白溝逕雍榆城南

春秋襄公二十三年叔孫豹救晉次于雍榆者也淇水又

水經注匯校 卷九

北逕其城東東北逕同山東又東北逕帝營冢西世謂之

頓丘臺非也皇覽曰帝營冢在東郡濮陽頓丘城南臺陰

野中者也又北逕白祀山東歷廣陽里逕顓頊冢西俗謂

之殷王陵非也帝王世紀曰顓頊葬東郡頓丘城南廣陽

里大冢者是也淇水又北屈而西轉逕頓丘北故闕駟云

頓丘在淇水南爾雅曰山一成謂之頓丘釋名謂一頓而

成丘無高下小大之殺也詩所謂送子涉淇至于頓丘者

也魏徙九原西河土軍諸胡置土軍于丘側故其名亦曰

土軍也又屈逕頓丘縣故城西古文尚書以為觀地矣蓋

太康第五君之號曰五觀者也竹書紀年晉定公三十一年城頓丘皇覽曰頓丘者城門名頓丘道世謂之殷皆非

也蓋因丘而為名故曰頓丘矣淇水東北逕枉人山東牽城西春秋左傳定公十四年公會齊侯衛侯于牽者也杜預曰黎陽東北有牽城卽此城矣淇水又東北逕石柱岡東北注矣

東過內黃縣南為白溝

淇水又東北逕并陽城西世謂之辟陽城非也卽郡國志所謂內黃縣有并陽聚者也白溝又北左合蕩水又東北流逕內黃縣故城南縣右對黃澤郡國志曰縣有黃澤者也地理風俗記曰陳留有外黃故加內史記曰趙廉頗伐魏取黃卽此縣

屈從縣東北與洹水合

水經注匯校 卷九

白溝自縣北逕戲陽城東世謂之蕘陽聚趙氏一清曰蕘陽聚見光武帝紀章懷注中說文蕘字下云墨翟書義從弗魏郡有蕘陽鄉讀若錡則蕘與義字可通用也春秋昭公

十年晉荀盈如齊逆女還卒戲陽是也白溝又北逕高城亭東洹水從西南來注之又北逕問亭東卽魏界也魏縣故城應劭曰魏武侯之別都也城內有武侯臺王莽之魏城亭也左與新河合洹水枝流也白溝又東北逕銅馬城

西蓋光武征銅馬所築也故城得其名矣白溝又東北逕羅勒城東又東北漳水注之謂之利漕口案魏志建安十八年鑿渠引漳水入白溝以通河是也自下清漳白溝淇河咸得通稱也

又東北過館陶縣北又東北過清淵縣西

白溝水又東北逕趙城西又北阿難河出焉蓋魏將阿難

所導。趙云元和志云魏將李阿難以利衡瀆。遂有阿難之稱矣。白溝又

東北逕空陵城西。又北逕喬亭城。西東去館陶縣故城十五里。縣卽春秋所謂冠氏也。魏陽平郡治也。其水又屈逕其縣北。又東北逕平恩縣故城。東地理風俗記曰縣故館陶之別鄉也。漢宣帝地節三年置以封后父許伯爲侯國。地理志王莽之延平縣矣。其水又東過清淵縣故城西。又歷縣之西北爲清淵。故縣有清淵之名矣。世謂之魚池。城非也。其水又東北逕榆陽城北。漢武帝封太常江德爲侯國。文穎曰邑在魏郡清淵。世謂之清淵城。非也。

又東北過廣宗縣東爲清河

清河東北逕廣宗縣故城南。和帝永元五年封皇太子萬

水經注匯校

卷九

九

年爲王國田融言。趙立建興郡于城內。置臨清縣于水東。自趙石始也。清河之右有李雲墓。雲字行祖。甘陵人。好學。善陰陽。舉孝廉。遷白馬令。中常侍。單超等立掖庭民女。亳氏爲后。何云卽廢鄧后也。表紀作亳。后家封者四人。賞賜巨萬。雲上書移副三府曰。孔子云。帝者諦也。今尺一拜用。不經御省。是帝欲不諦乎。帝怒。下獄殺之。後冀州刺史賈琮使行部。過祠雲墓。刻石表之。今石柱尙存。俗猶謂之李氏石柱。清河又東北逕界城亭。東水上有大梁。謂之界城橋。英雄記曰。公孫瓚擊青州黃巾賊。大破之。還屯廣宗。袁本初自往征瓚。合戰于界橋南二十里。紹將麴義破瓚于界城橋。斬瓚。冀州刺史嚴綱又破瓚殿兵于橋上。卽此梁也。世謂之扁

城橋蓋傳呼失實矣清河又東北逕信鄉縣故城西閱案

字依趙本以地理風俗記曰甘陵西北十七里有信鄉故

縣也清河又北逕信成縣故城西應劭曰甘陵西北五十

里有信成亭故縣也趙置水東縣于此城故亦曰水東城

清河又東北逕清陽縣故城西漢高祖置清河郡治此景

帝中三年封皇子乘爲王國王莽之平河也漢光武建武

二年西河鮮于冀爲清河太守作公廨未就而亡後守趙

高計功用二百萬五官黃秉功曹劉適言四百萬錢于是

冀乃鬼見白日道從入府與高及秉等對共計校定爲適

秉所割匿冀乃書表自理其略言高貴不尙節晦壘之夫

而箕踞遺類研密失機婢妾其姓媚世求顯偷竊很鄙有

水經注匯校 卷九

三

辱天官易譏負乘誠高之謂臣不勝鬼言謹因千里驛聞  
位高上之便西北去三十里車馬皆滅不復見秉等皆伏  
地物故高以狀聞詔下還冀西河田宅妻子焉兼爲差代  
以弭幽中之訟漢桓帝建和三年改清河爲甘陵王國以  
王妖言徙其年立甘陵郡治此焉

又東北過東武城縣西

清河又東北逕陵鄉西應劭曰東武城西南七十里有陵  
鄉故縣也後漢封太僕梁松爲侯國故世謂之梁侯城遂  
立侯城縣治也清河又東北逕東武城縣故城西史記趙  
公子勝號平原君以解邯鄲之功受封于此定襄有武城  
故加東矣清河又東北逕復陽縣故城西漢高祖七年封

右司馬陳胥爲侯國王莽更名之曰樂歲地理風俗記曰東武城西北三十里有復陽亭故縣也世名之曰檻城非也。清河又東北流逕棗疆縣故城西史記建元以來王子侯者年表云漢武帝元朔二年封廣川惠王子晏爲侯國也。應劭地理風俗記曰東武城縣西北五十里有棗疆城故縣也。

又北過廣川縣東

清河北逕廣川縣故城南關駟曰縣中有長河爲流故曰廣川也水側有羌壘姚氏之故居也今廣川縣迨清河又東北逕歷縣故城南地理志信都之屬縣也王莽更名曰歷甯也應劭曰廣川縣西北三十里有歷城亭故縣也今

水經注匯校

卷九

三

亭在縣東如北趙云如往也如北言自東往北也水濟尙謂之爲歷口渡也

又東過脩縣南又東北過東光縣西

清河又東北左與張甲屯絳故瀆合阻深堤高郭無復有水矣又逕脩縣故城南屈逕其城東脩音條王莽更名之曰修治郡國志曰故屬信都清河又東北左與橫漳枝津故瀆合趙云橫漳卽衡漳也朱氏失箋又東北逕脩國故城東漢文帝封周亞夫爲侯國故世謂之北脩城也清河又東北逕邸閣城東城臨側清河晉脩縣治城內有縣長魯國孔明碑清。河又東至東光縣西南逕胡蘇亭地理志東光有胡蘇亭者也世謂之羌城非也。又東北右會大河故瀆又逕東光

縣故城西後漢封耿純爲侯國初平二年黃巾三十萬人入渤海公孫瓚破之于東光界追奔是水斬首三萬流血丹水卽是水也

又東北過南皮縣西

清河又東北無棣溝出焉東逕南皮縣故城南又東逕樂亭北地理志之臨樂縣故城也王莽更名樂亭晉書地道志太康地記樂陵國有新樂縣卽此城矣又東逕新鄉城北卽地理志高樂故城也王莽更之曰爲鄉矣無棣溝又東分爲二瀆無棣溝又東逕樂陵郡北又東屈而北出又東轉逕苑鄉縣故城南又東南逕高成縣故城南趙云此見兩漢晉魏史志未詳處所與枝瀆合枝瀆上承無棣溝南逕樂陵郡

水經注匯校

卷九

三

西又東南逕千童縣故城東史記建元以來王子侯者年表曰故重也一作千鍾漢武帝元朔四年封河間獻王子

劉陰爲侯國應劭曰漢靈帝改曰饒安也趙氏一清曰史漢表千童侯劉

陰地在平原則是一縣漢志注應劭曰靈帝改曰饒安者也道元混而一之滄州治枝瀆又南

東屈東北注無靈溝無棣溝又東北逕一故城北世謂之

功城也又東北逕鹽山東北入海春秋僖公四年齊楚之

盟于召陵也管仲曰昔召康公賜命先君太公履北至于

無棣蓋四履之所也京相璠曰舊說無棣在遼西孤竹縣

二說參差未知所定然管仲以責楚無棣在此方之爲近

既世傳已久且以聞見書之清河又東北逕南皮縣故城

西十三州志曰章武有北皮亭故此曰南皮也王莽之迎

河亭史記惠景侯者年表云漢景帝後七年封孝文后兄子彭祖爲侯國建安中魏武擒袁譚于此城也清河又北逕北皮城東左會滹沱別河故瀆謂之合口城謂之合城也地理風俗記曰南皮城北五十里有北皮城卽是城矣又東北過浮陽縣西

清河東北流浮水故瀆出焉按史記趙之南界有浮水焉浮水在南而此有浮陽之稱者蓋浮水出入津流同逆混并清漳二瀆河之舊道浮水故迹又自斯別是縣有浮陽之名也首受清河于縣界東北逕高成縣之苑鄉城北又東逕章武縣之故城北漢景帝後七年封孝文后弟竇廣國爲侯國王莽更名桓章晉太始中立章武郡治此浮水

水經注匯校

卷九

三

故瀆又東逕篋山北魏土地記曰高成東北五十里有篋山長七里浮瀆又東北逕柳縣故城南漢武帝元朔四年封齊孝王子劉陽爲侯國地理風俗記曰高成縣東北五十里有柳亭故縣也世謂之辟亭非也浮瀆又東北逕漢武帝望海臺趙氏一清曰一統志武帝臺在鹽山縣東北七十里水經注浮水所經蓋南臺也下章武縣臺乃是北臺又東注於海應劭曰浮陽縣浮水所出入海朝夕往來日再今溝無復有水也清河又北分爲二瀆枝分東出又謂之浮瀆清河又北逕浮陽縣故城西王莽之浮城也建武十五年更封驍騎將軍平鄉侯劉歆爲侯國浮陽郡治又東北滹沱別瀆注焉謂之合口也

又東北過濊邑北

濊水出焉案濊水詳濁濊水注內

又東北過鄉邑南

清河又東分爲二水枝津右出焉東逕漢武帝故臺北魏土地記曰章武縣東百里有武帝臺南北有二臺相去六十里基高六十丈俗云漢武帝東巡海上所築又東注于海清河又東北逕姑邑南俗謂之新城非也

又東過窮河邑南

清河又東北逕窮河邑南俗謂之三女城非也東北至泉州縣北入滹沱水經曰笥溝東南至泉州縣與清河合自下爲派河尾也案原本訛作水經曰笥溝泉周縣東南與清河合者自下爲清河下邑也近刻曰又訛作白自又訛作目考沽河經文云又東南至雍奴縣西爲笥溝又東南至泉州縣與清河合東入于海清河者派

水經注匯校 卷九

河尾也今據以訂此文之舛誤又東泉州渠出焉

又東北過漂榆邑入于海

清河又東逕漂榆邑故城南俗謂之角飛城趙記云石勒使王述煮鹽于角飛即城異名矣魏土地記曰高城縣東北百里北盡漂榆東臨巨海民咸煮海水藉鹽爲業即此城也清河自是入于海

蕩水出河內蕩陰縣西山東

蕩水出縣西石尙山泉流逕其縣故城南縣因水以取名也晉伐成都王穎敗帝于是水之南盧緄四王起事曰惠帝征成都王穎戰敗時舉輦司馬八人輦猶在肩上軍人競就殺舉輦者乘輿頓地帝傷三矢百僚奔散唯侍中嵇



紹扶帝士將兵之帝曰吾吏也勿害之眾曰受太弟命惟不犯陛下一人耳遂斬之血汗帝袂將洗之帝曰嵇侍中血勿洗也此則嵇延祖殞命之所

又東北至內黃縣入于黃澤

羨水出蕩陰西北韓大牛泉地理志曰縣之西山羨水所出也羨水又東逕韓附壁北又東流逕羨城北故羨里也史記音義曰牖里在蕩陰縣廣雅牖獄犴也夏曰夏臺殷曰羨里周曰囹圄皆圜上昔殷紂納崇侯虎之言囚西伯于此散宜生南宮括見文王乃演易用明否泰始終之義焉羨城北水積成淵方十餘步深一丈餘東至內黃與防水會水出西山馬頭澗東逕防城北盧諶征艱賦所謂越

水經注匯校

卷九

三

防者也其水東南流注于羨水又東歷黃澤入蕩水地理志曰羨水至內黃入蕩者也蕩水又東與長沙溝水合其水導源黑山北谷東流逕晉鄙故壘北謂之晉鄙城名之爲魏將城昔魏公子無忌矯奪晉鄙軍于是處故班叔皮遊居賦曰過蕩陰而弔晉鄙責公子之不臣者也其水又東謂之宜師溝又東逕蕩陰縣南又東逕枉人山東北至內黃縣右入蕩水亦謂之黃雀溝水水秋夏則泛春冬則耗蕩水又逕內黃城南陳留有外黃故稱內也東注白溝

洹水出上黨泜氏縣

水出洹山山在長子縣也

東過隆慮縣北

縣北有隆慮山昔帛仲理之所遊神也。縣因山以取名。漢高帝六年封周竈為侯國，應劭曰：殤帝曰隆，故改從林也。縣有黃華水，出于神囷之山，黃華谷北崖上山高十七里。水出木門，帶帶即山之第三級也。去地七里，懸水東南注壑，直瀉巖下，狀若雞翹，故謂之雞翹。洪蓋亦天台赤城之流也。其水東流至谷口，潛入地下，東北十里復出名柳渚。渚周四五里，是黃華水重源再發也。東流葦泉水注之水，出林慮山北澤中，東南流與雙泉合水，出魯般門東下流。入葦泉水，葦泉水又東南流注黃華水，謂之陵陽水。又東入于洹水也。趙氏一清曰：虞世南北堂書鈔引此有黃華謂之聖人穴，太平寰宇記引此云黃華谷西北有洞穴，謂之聖水窟，今本無之。

水經注匯校

卷九

又東北出山過鄴縣南

洹水出山東逕般墟北。竹書紀年曰：盤庚即位，自奄遷于北蒙，曰般。昔者項羽與章邯盟于此地矣。洹水又東，枝津出焉。東北流逕鄴城南，謂之新河。又東，分為二水：一水北逕東明觀下，昔慕容雋夢石虎齧其臂，寤而惡之，購求其尸而莫之知。後宮嬖妾言虎葬東明觀下，于是掘焉。下度三泉，得其棺，剖棺出口，口僵不腐。雋罵之曰：死胡安敢夢生天子也。使御史中尉陽約數其罪而鞭之。此蓋虎始葬處也。又北逕建春門，石梁不高，大治石工，密舊橋，首夾建兩石柱，螭矩趺，勒甚佳。乘輿南幸，以其作制華妙，致之平城。東側西闕北對射堂，綠水平潭，碧林側浦，可遊憩矣。其

水西逕魏武玄武故苑苑舊有玄武池以肄舟楫有魚梁釣臺竹木灌叢今池林絕滅略無遺跡矣其水西流注于

漳南水東北逕文亭城北又東北逕高陵城南東合垆溝

又東逕鸛鵲陂閔案趙本據名勝志引此文有黃陂衣水注之五字因校增今闕疑北與台

陂水合陂東西三十里南北案此下有脫文下云注白溝河溝上承洹水亦訛脫不可

考注白溝河溝上承洹水依戴本河溝連讀北絕新河北逕高陵

城東又北逕斥丘縣故城西縣南角有斥丘蓋因丘以氏

縣故乾侯矣春秋經書昭公二十八年公如晉次于乾侯

也漢高帝六年封唐厲為侯國王莽之利丘矣又屈逕其

城北東北流注于白溝洹水自鄴東逕安陽縣故城北徐

廣晉紀曰石遵自李城北入斬張豺于安陽是也魏土地

水經注匯校 卷九

七

記曰鄴城南四十里有安陽城城北有洹水東流者也洹

水又東至長樂縣左則枝溝出焉洹水又東逕長樂縣故

城南按晉書地理志曰魏郡有長樂縣也

又東過內黃縣北東入于白溝

洹水逕內黃縣北東流注于白溝世謂之洹口也許慎說

文呂忱字林並云洹水出晉魯之間趙氏一清曰俗本說文作齊魯之間當以此正

昔聲伯夢涉洹水或與已瓊瑰而食之泣而又為瓊

瑰盈其懷矣從而歌曰濟洹之水贈我以瓊瑰歸乎歸乎

瓊瑰盈吾懷乎後言之之暮而卒即是水也

水經注匯校卷九終